

Enei Bun Ifaredif Nē Fadedya Aa FigiEnei Bun Ifaredif Nē Fadedya Aa Tetek

Od Marik Nu Testamen Enei Bun Ifaredif Nē Fadedya

Aa Fig

Aa fig are aa taka, in faat anī yōya nigin dan bagai.

Aa Gaula Sumeī Biya (Luk 1:9-11; Revelesen 8:3, 4)

Aa gaula sumeī biya are aa taka nē sumin aarau ado warumutei anidi bunem dinodig. Tempel bun, tamo kayau Negur bun kosē douf sain bun, aa gaula sumeī biya anī tō difedig, are sumeī meli bagai youf nigin.

Aa Hisop (Jon 19:29; Hibru 9:19)

Aa hisop are aa taka, pris idi naan be naud bun nu difeis fen, safina bun be tamo kayau bun wiri difedig, are idi suma anī bunem Negur nē lo fiya bun fateul wō youf nigin age difedig.

Aa Oliv (Rom 11:17, 24; Jems 3:12; Revelesen 11:4)

Aa Oliv are aa taka, anī faat adodig. Juda idi aa oliv faat nem moul dinodig. Moul anī saaf yabiya nigin, bouwa bun wā fiya di, sumeī biyauf nigin ado ereb tunī musei nagineg anī kabī difenēdig. Juda idi neid ibodōya bun, oliv are safina odug bagai. Aa Oliv nē Arei are arei taka Jerusalem non ibodok, an aa oliv ifaredidig.

Aa Tetek

Rom tamo kayau neid tobonunā bun, tamo taka ereb sane bagai age fen ouf, are eig fiya,

Enei Bun Ifaredif Nē Fadedya Aa Wain FaatiiEnei Bun Ifaredif Nē Fadedya Abraham

taka yukesiya be, taka fefu fiye ken, bē yaleya
anī, idi ī kafī fiya bun aa tetek ilun dū di, laa
fouf nigin age difedig.

Idi aa masak uru aninem aa tetek dinodig,
age difel fen, idi tutim tamo aa tetek bun dūdig,
oo, malum ī difōdig. Age de fen, idi aa tetek
dales diteg ifare di, tamo an ditornē di, ī an
kuuri yef ile laa fedig. Tamo taka ī aa tetek bun
eig de duk, ī darau odug bagai yalef ile fen, dum
ī laa fedig. Are anīg taka, mama yaleya nigin
odug bagai.

Aa Wain Faat

Aa wain faat are faat taka. Anī bunem wain
dinodig. Juda idi nedī kabier aa wain musei
ditenēdig, age de fen, idi aa wain faat musei
youf nigin aa wain el de lo difedig.

Abel (Matyu 23:35; Luk 11:51; Hibru 11:4,
12:24)

Abel are, ī Kain tura naal.

Abraham

Abraham ī, Israel tamo kayau neid temeid
matu. Kulu bagai, Negur ī Abraham irokenen,
are ī teneub mata taka ī an ibodōf nigin ifenēf
yen. Age fe di, teneub anī dogo neid bagai youf.
Abraham yagon fō gariya itor ken, ile teneub
anī imirēf nigin Negur ī irokenen. Abraham
dōf age fen. ī yar musei, gerō bagai iyok ile, ile
teneub anī fotou fen. Teneub are gama Israel
dedig anī.

Are Abraham bun, Negur in uyulil bar
itenēya anī inon. Negur ī Abraham irokenen, ī
ado in ibor tar anī, Negur nē tamo kayau bagai

Enei Bun Ifaredif Nē Fadedya AdamiiiEnei Bun Ifaredif Nē Fadedya Adam

wowā youf, aib idi Negur dō difouf are, Negur idi kulatun fediyouf yen.

Abraham aiwa, Sara dedig anī yalen. Idi kesu taka yaleya san, ile ile, idi uruwom tubau bagain. Anī nigin, Negur memelik ino di, Sara kesu gō fen. Idi kesu yana dū Isak den.

Isak ī biya fen, ī kayau Rebeka dedig anī yalen. Rebeka kesu uru gō fen, are idi aina ado, idi yeneid are Esau, Jakop ado. Jakop ī yana takag Israel, ī bunem Juda idi, Israel tamo kayau yeya yana anī dalen.

Kesu monog uru anidi taka, Jakop ī kayau uru tura ado anī gei fen, idi yeneid Lea, Rahel ado, babaneg kayau uru yalen. ī kesu monog tuwelf gogū fen, idi anī Israel ibor tuwelf neid tubuid tar. Idi yeneid Jon nē kurō fesiya od 7:4-8 (Revelesen 7:4-8) nē itotoya bun gī fen.

Kesus monog eneidi, kesu musei adodof ile, Israel tamo kayau fulus bagai felen. Anī nigin, idi adok Abraham nē ibor tar.

Adam (Luk 3:38; Rom 5:14; 1 Korin 15:22, 45; 1 Timoti 2:13, 14; Jud 14)

Negur uyulil tamo inon, are Adam. Negur ī Adam kare fiyen, are teneub nem.

Adam ī, aiwa Eva adam, uyulil Negur nē ītāfiya difodul ken, mosor dinon. Sain anī bunem ilen, tamo mosor bun dilelen.

1 Korin 15:45 bun, Jesus kristus ī, idikeleya nē Adam yef, ere nigin, ī tamo kayau, nedī mosor bun tamal kel gei fedin. Adam im mosor inon, anim tamo kayau tunī ganan mosor bun dilelen. Jesus Kristus, tamo kayau dogo neid mosor bun tamal kel gei feid fen, idi ibodōya

Enei Bun Ifaredif Nē Fadedya AlabastaivEnei Bun Ifaredif Nē Fadedya Areopagus

mata anī ifenēdin.

Alabasta (Matyu 26:7; Mak 14:3; Luk 7:37)

Sain taka bun, kayau taka, moul sumeī meli bagai anī, Jesus ye kulo fouf nigin irou isin. Moul enei, gulub taka, are meein gariya fire taka nem dinon anī namen ibodon. Meein age fiya anī alabasta dedig.

Alta

Juda idi, Negur bun sesewi fediya anī age difedig. Idi, sesewi fiya nigin, yaro, are sipsip, meme be, bulmakau age fediya anī didenkesidig. Alta are, modoū an sesewi difedig. Meein nem anī dinodig.

Aposel

Jesus uyulil in dō fiya tar tuwelfigirnēdin, are idi yagon aposel wowā douf nigin (Matyu 10:1-4; Mak 3:13-19; Luk 6:12-16).

Tamo enidi ī geid dibod ken, ifelnēdin. Jesus laaf fen, kel fā yen sain bun, idi ī meledim dilen. ī, tamo kayau bun, ereb idi dilen ado biya od wogō difediyouf nigin idi susur fedin. Idi, tamo kayau Jesus nigin momoi den anidi neid uyu irouya wowā den.

Aposel nē buk bun, Pol, Banabas ado, tamo tunīg, are idig aposel dedig. Idig tamo Jesus Kristus nē kabī yaleya nigin igirnēdin. Inglis nem, tamo enidi are ‘apostles’ dedig. Od enei nē gariya are, tamo idi susur fedif anidi.

Areopagus (Aposel 17:19-22; 34)

Areopagus are, arei mudu taka nē yana Atens taun ibodon. Taun tamo kayau yeneid adodo arei mudu anī bun guru difedig. Anī nigin,

Enei Bun Ifaredif Ně Fadedya AronvEnei Bun Ifaredif Ně Fadedya Atemis

tamo kayau anidi neid guru fiya anīg Areopagus dedig.

Aron (Luk 1:5; Aposel 7:40; Hibru 5:4, 7:11, 9:4)

Aron ī, Jakop ně gere tar tuwelf atun taka Lewi ně ibor bun tamal anī taka. Tamo anī, ī pris kabī yalouf nigin uyulil igirnen, are Negur ī iron, Aron ně ibor tar anidi, Israel tamo kayau are Juda anidi atun, pris dibodōf, yen.

Aron ī, are Moses tura biya. Idi uruwom uyu kū de fen, Israel tamo kayau Isip neid ferfer difaren sain bun, kabī dalen. Idi israel tamo kayau kafī fiya bun tamal dalelnēdiyout nigin uyu diroun.

Sain taka bun, Israel tamo kayau tunī, Moses ado Aron kiwai difenēdi di, Negur ī, idi anī uyu irouya tamo bagai igirnēdin anī yaor fe ifelnēdin. Negur, idi Israel ibor tuwelf uyu irouya morou morou neid manig dale, Negur ně Salafat bun gō difouf nigin irokenēdin. Negur ī iron, tamo ī uyu irouya ibodōf nigin igirnen, are yagon manig ifaraūf, yen. Naa taka di, Aron ně manig bonu fel, ifirau kel fen, faat yun. Negur iron, sain anī bunem ilauf ganan, Aron ně manig enei are Negur ně Salafat bun bar itenēya ně bogis namen uris gen ibodōf, yen.

Asaia (Matyu 3:3; Aposel 8:30; Rom 9:27-29)

Asaia ī Negur ně propet odug taka. Kulu bagai Jesus Kristus tenebur isiya sā mog, Asaia ereb musei ī bun wowā youf anī nigin wogō yen.

Atemis (Aposel 19:24-35)

Enei Bun Ifaredif Nē Fadedya Awa Uur FateulviEnei Bun Ifaredif Nē Fadedya Babilon

Atemis are kayau waitou taka yana, anī Asia teneub bun, tamo kayau musei, ī yana dalesedig.

Awa Uur Fateul

Awa Uur Fateul are Negur nē Uur. Awa Uur Fateul, Negur, Jesus Kristus, idi are tekelei (Matyu 28:19). Negur nē Awa Uur, tamo kayau Jesus Kristus nigin momoi def anidi bun ibodōdig. ī kabī yaledig are eig fiya:

1. ī tamo kayau momoi anī keleī youf nigin age fedig (Jon 16:13; 1 Korin 2:10-13).
2. ī idi Jesus Kristus nigin momoi def anidi nigin, Negur kosē fiyēdig (Rom 8:26).
3. ī tamo kayau Negur nē naab keleī youf nigin, ulum iroukenēdidig (Aposel 13:2; 16:6, 7).
4. ī tamo kayau Negur nē od wogō de fen, yagon kabī dalouf nigin megeir ifenēdidig (1 Korin 2:4, 5).
5. ī tamo kayau mugu mugu sios kabī dale di, sios ganan totol ifarauf nigin megeir ifenēdidig (1 Korin sapta 12, 14)

Baali

Baali are faat taka age fiya. Are wit gen. Tamo kayau in faat anidi nem, bret dinodig, anī ere, baali bunem bret dinof, are to biya, are wit bunem bret dinof bagai gen sā.

Babilon

Babilon are, taun odug bagai taka anī yana. Kulu bagai, tamo kayau teneub anī bun temeleid, Israel tamo kayau geid kusī de fen, idim wal difedin. Idi, Israel tamo kayau musei ferfer gen, nedī teneub bun guri difeid

Enei Bun Ifaredif Nē Fadedya Bal vii Enei Bun Ifaredif Nē Fadedya Balam

diroulen, age dife di, Israel tamo kayau idi, sewenti yar an difaren (Matyu 1:11, 12, 17; Aposel 7:43).

Jon nē kurō fesiya od buk bun (Revelesen 14:8, 17:5, sapta 18) taun taka Babilon def anī nigin irok. Are fau Rom taun nē be uris nigin anī irok. 1 Pita 5:13 nē itotoya bun, Babilon are fau de be Rom taun nigin irok.

Bal (Rom 11:4)

Bal are idegēyā waitou taka. Kulu bagai, Israel tamo kayau, Israel teneub bun dile dibodōyā sā mog, tamo kayau teneub anī bun difaredig, Bal waitou anī yana dalesedig. Sain tunī, Israel tamo kayaug, Negur yana yaleseya ditor ken, Bal waitou yana dalesedig. Anī nigin, Negur fatuk bagai idi nigin name isedig.

Balam (2 Pita 2:15; Jud 11; Revelesen 2:14)

Balam are Negur nē profet taka. Sain taka bun, teneub taka Moab dedig anī bun, an Israel tamo kayau neid kiwai tar difaren. Nedi king are Balak dedig. Balak ī, Balam Israel tamo kayau isisnēdiyout nigin wau iron, age fe di, ī idi kusī bun wal fediyout nigin. Uruwa bun, Balam ī itoron, anī ere, ī Balak nē modoū bun ileya nigin gariya inon. ī fau naab luwe ile mog, engel naabura ī ilauf nē bun katī fel ifaren. Donki Balam teten ibod ken, ilen anī, engel ile fen, norū fel ileya nigin itoron, malakaī, Balam ī wagī fiyeneg ileya san. Are donki Balam iroken ken, ī ou fiyen.

Balam ī, Israel tamo kayau to isisnēdin, ere nigin, ī keleī, Negur el fiya idi ifenēdin. Balam nigin, Nu Testamen nē itotoya bun irok, are ī

Enei Bun Ifaredif Nē Fadedya Bar Itenēyaviiii Enei Bun Ifaredif Nē Fadedya Bar Itenēya Nē Bogis

moni nigin wau laa fen, ere nigin, Balak ī Negur
nē tamo kayau neid kiwai fiyeneg, Balam ī
Balak isennēf nigin yo yen (Namba sapta 22-
24).

Bar Itenēya (Namba wan bar itenēya: Luk 1:72; Aposel 3:25, 7:8; Galesia 3:17; Hibru 9:1;
Namba tu bar itenēya: Matyu 26:28; Mak 14:24;
Luk 22:20; Rom 11:27; 1 Korin 11:25; 2 Korin 3:6;
Hibru 7:22, 8:6-13, 9:15, 10:16, 29, 12:24, 13:20)

Bar itenēya are tamo kayau uruwo atun dinodig. Sain tamo taka ī bar itenēya inou fenē, ī
tamo taka nigin, ereb taka agef kenēf anī, age
afouf bagai fiyek, are abag solo fef, are tamo
taka ī nigin, ereb taka age fenēf anī, age afouf
bagai yedig. Negur ī yogo, yagon tamo kayau
geid bar itenēya anī ino fen, yagon tamo kayau
ī dō difiyēf are, ī dogo neid Temeid ado Odug
ibodōf nigin, age afouf yen.

Negur bar itenēya uruwo anī inon. Bar
itenēya uyulil bun, Negur ī Moses ado bar
itenēya inon, agef fen, Negur iron, are idi aib
aib yagon lo dirouwaufare, ī yagon tamo kayau
bagai gen gei fediyouf. Anī ere, takam in lo
dō feleya bagai kisin san, anī nigin, takam,
Negur mala bun bar itenēya uyulil bun, madur
bagai wōya kisi feleya san. Bar itenēya mata
bun, Negur iron, tamo taka Jesus Kristus nigin
momoi youf are, ī Negur mala bun madur bagai
wō ye di, ī kel yaleyēf, are ī in lo ifodulēya be
mosor to inon gen Negurem ileyēf.

Bar Itenēya Nē Bogis (Hibru 9:4; Revelesen
11:19)

Enei Bun Ifaredif Nē Fadedya BarakixEnei Bun Ifaredif Nē Fadedya Dawid

Bogis anī, aa nem dino fen, bouwa ganan gol nem degē difelen. Namen meein odudug uruwo, are teten Negur ītāfiya ten itotodin anī dibodon (Hibru 9:4, 5). Israel tamo kayau gerere tuan luwe diyok dile fen, bogis are de ado faali de dilen, age de fen, Negur nē Salafat bun dinodig. Bogis ado safina namen ifaredin, are fateul bagai, ere nigin, are bar itenēya Negur ī Israel tamo kayau geid inon anī nē uris.

Barak (Hibru 11:32)

Barak are, Israel tamo kayau neid uyu iroukenēdiya odug taka. ī kusī bun idi uyu iroukeneid dile fen, nedī kiwai tar wal difedin (Jas sapta 4, 5).

Bea (Revelesen 13:2)

Bea are gaar taka odug bagai, anī teneub tunī bun dubur difaredig.

Belsebul

Belsebul are uur neid yana taka anī, ibor tunī Israel tamo kayau non difaref anidim yana dalesedig. Gariya bun bagai, ī Bal-sebub deden. ī anīg, Satan dedig, yogo anī kaa sesen neid mudur.

Benjamin (Aposel 13:21; Rom 11:1; Filipai 3:5; Revelesen 7:8)

Benjamin ī are Jakop nē kesu monog tuwelf anidi taka, ī Juda neid tubuid tar tuwelf ibor anī taka.

Dawid

Dawid ī are Israel tamo kayau neid king odug bagai. ī in tama Jesi dedig anī ne naal ibuye. Kulu ī fau king wōya sā mog, ī ne tama nē sipsip anī lo lo fedin. Sain ī fau kesu oosi mog, guru

Enei Bun Ifaredif Nē Fadedya Dō Fiya TarxEnei Bun Ifaredif Nē Fadedya Engel

fiya taka bun, ī tamo odug bagai taka Goliat ado kusī de fen, yukesin.

Dawid ī, Negur nigin fatuk bagai wau laa fedig. ī, Negur yana yaleseya nigin seg musei itotodin, anī Sam dedig.

Are Dawid nē ibor bun anī Jesus ī wō yen (Rom 1:3; Revelesen 22:16). Kulu bagai, Kristus nigin anī iron, kel yaleya tamo anī Negur sur foul, are King Dawid nē ibor bun tamal taka.

Dō Fiya Tar

Inglis od bun, dō fiya tar are ‘disciple.’ Jesus nē dō fiya tar ganan, are tamo kayau Jesus nigin momoi def, in od karī de fen, dō difedig anidi.

Aposel nē buk bun, od tunī Jesus nē dō fiya tar nagineg agef faded fef, are ‘tamo kayau Jesus nigin momoi def anidi’ oo ‘tureid tar’ dedig.

Sain tunī, Matyu, Mak, Luk ado Jon nē buk bun, dō fiya tar tuwelf anidi nigin irok. Dō fiya tar tuwelf anidi, ī weim dibodōf nigin, fire bagai igirnēdin. Jesus ī, idig ne soosi tamo wowā douf nigin sur fedin, are Matyu 10:1-4 bun irok kilei.

Elisa (Luk 4:27) - Naman bun anī ulouf.

Eliya (Matyu 11:14; Mak 9:4; Rom 11:2; Jems 5:17)

Eliya ī Negur nē profet odug taka. ī nigin, nenerī Jems 5:17 bun anī itoton.

Engel

Engel are, Negur nē soosi tamo tar, saa ilun Negur wagen difaredig. Soosi tamo enidi, are tamo bagai sā, are idi uur. Idi malam ilediya kisi feleya sā, dogom yaorediyouf dogol.

Enei Bun Ifaredif Nē Fadedya Epikurian TamoxiEnei Bun Ifaredif Nē Fadedya Eva

Negur ī, yagon engel yagon kabī dalekenēf nigin sur fedidig. Dogo neid kabī are, Negur nē tamo kayau lo fediya nigin (Aposel 12:6-11, 27:23; Hibru 1:14). Sain taka taka, Negur, tamo taka bun od mata wogō youf nigin yagon engel susur fedidig.

Engel mudur ī Maikel dedig (Jud 9). Engel yana ado taka, are Gabriel (Luk 1:19, 26).

Epikurian Tamo (Aposel 17:18)

Epikurus nē dō fiya tar ado, tamo kayau foi fiya anī ‘Stoik Tamo’ dedig anidi, idi keleī adodo anī, momoi ado keleī yaleya nigin fatuk bagai kisi difedig. Idi eneidi katō fiya nigin, sain musei daledig.

Esau (Rom 9:13; Hibru 11:20, 12:16-17)

Isak kesu uruwo gō fedin, are idi aina ado. Idi Esau ado Jakop dedig. Esau ī kesu matu, anī ere, sain taka bun, Esau ī naū fe fen, ī saaf bunem yagon kesu matu nē akor anī Jakop bun solo fen. Esau ī, are Jakop anī, yagon kesu matu nē el fiya anī yalouf nigin, saaf tar yabiya bunem solof ifenēf nigin yo yen.

Eva (2 Korin 11:3; 1 Timoti 2:13)

Eva ī Adam aiwa. Negur teneub kare fen sain anī bun, ī uyulil Adam ino fen, ī Adam ne siri tuwa taka anī yale fen, anī nem Eva ineyen. Kū fenēyā bunem, Eva gogour nē sigor dō fen, are Satanem Eva idegnē di, kayau ī aa faat anī Negur to dāf nigin idi irokenēdin anī yon. Kayau ī aa faat tunīg, Adam ifenē di, ī aa faat anī yon. Idi uyulil Negur nē ītāfiyā anī wal difen, sain anī bunem ilen, tamo kayau mosor

Enei Bun Ifaredif Nē Fadedya Faat Korō Feleya TamoxiiEnei Bun Ifaredif Nē Fadedya Grik

dinodif disin. Adam Eva ado idi kesu towo, are idi Kain, Abel ado, Set.

Faat Korō Feleya Tamo (Matyu 19:12; Aposel 8:27)

Tamo faat korō felediya, idi kabī tamo odudug, king nē aruna daledig. Teneub uyu takā tunī neid tobonunā bun, idi tamo anidi faat korō difel kenēdidig.

Farao (Aposel 7:10, 13, 21; Rom 9:17; Hibrū 11:24)

Farao ī Isip tamo kayau neid king odug nē yana. Nedi king odug ganan Farao dedig.

Farisia

Farisia are, Juda tamo kayau idi atun, mala odug bagai taka. Farisia idi musei lo ifelnēyā kabī daledig. Idi, Negur nē lo Moses ifenen anī keleī bagai, age de fen, idi tobonunā musei ado nun idi tobol difedin anīg difelnēdidig. Idi tamo kayau tunī ganan wal fediya gen momoi de fen, dogo yeneid dalesedig. Idi sain musei mala yaleya tamo, idi namedin kisi sane ado fen, mayarē biya gen tamomoi dedig. Farisia idi, Jesus kiwai difen ken, ī dukesiyouf nigin kisi difen.

Gidion (Hibrū 11:32)

Gidion ī Israel tamo kayau nē uyu irouya odug taka. ī momoiya odug ado fen, Negur ulum iroukenēf nigin ī bun kosē yen. ī tamo musei sā kusī bun irou leid fen, idi Negur nē isennēyā bunem nedī kiwai tar wal difedin.

Gomora - Sodom bun ulouf.

Grik

Enei Bun Ifaredif Nē Fadedya HagarxiiiEnei Bun Ifaredif Nē Fadedya Hagar

Grik anī kantri taka. Grik nē taun mudur are Atens, are Korin tauneg, teneub anī bun ibodok.

Grik tamо kayau idi keleī odug bagai adodo, anī nigin, tenebur tamо kayau nedи kisi biya nigin anini difiyēdidig. Tamо kayau musei Grik od anī wogō dedig. Jesus Kristus teneub enei bun ibod mog, tamо kayau keleī adodo ganan Grik od anī wogō dedig. Nu Testamen anī Grik od nem uyulil ditoton.

Hagar (Galesia 4:24, 25)

Hagar ī Abraham aiwa Sara nē fō nē kabī kayau taka anī. Sain anī bun, Sara kesu taka fau gō fiya sā mog, ī Hagar Abraham ado denēf nigin irokenen, age fe di, Abraham bunem Ismael dedig anī wō yen. Ismael ī anī, Negur ī, Abraham ifenēf nigin promis od to ifenen. Anī nigin, Ismael ne ibor tar, Negur ī ereb Abraham nē ibor tar ifenēdiyouf nigin promis od ifenen anī to dalen. Dum, Sara yogo Isak gō fen, kesu anī, Negurem Abraham Sara ado ifenēdiyouf nigin promis od anī irokenēdin.

Sara Isak gō fel fen, ī Hagar monē fiye ken, kesu ado irudi di, diyawon. Hagar ile arei mudu Sinai dedig non ibodon. Arei mudu anī bun an, yar musei ilele di, dum Negur Moses iroken ken, ī yogon ītāfiya ifenen. Anī nigin, Galesia 4 bun irok, are Hagar ī ferfer kayau taka, ī idi tamо kayau Negur nē ītāfiya nē ferfer dibodok anidi neid malakanon yef. Idi ferfer, ere nigin, idi momoi def are, tamо taka Negur nē ītāfiya ganan dōfef anī, ī Negur mala bun madur bagai wō ye di, Negurem yalouf def.

Enei Bun Ifaredif Nē Fadedya HaidenxivEnei Bun Ifaredif Nē Fadedya Herod

Idi Negur nē od eig fiya anī to momoi def, are ganan Jesus Kristus nigin momoi def anidi Negur mala bun madur bagai wō def anī.

Haiden

Inglis od nem ‘Gentile’ are tamo kayau ganan idi Juda sā anidi. Grik od bun anī nē gariya are teneub ganan bun tamo kayau difaref anidi, anī are, Juda sā anī. Juda idi amam amam yeya bagai dedig, ere nigin, Negurem idi yogon tamo kayau igirnēdin nigin, age fe di, idi teneub tunī ganan nē tamo kayau lalai difedidig.

Halleluya (Revelesen 19:1-6)

Sain Juda idi Negur yana dalesau fenē, idi ‘Halleluya’ de kakaī dedig. Od anī nē gariya are “Negur yana taleseg.”

Hermes (Aposel 14:12)

Hermes are, waitou taka yana anī Grik idi yana dalesedig. Grik tamo kayau dirōdig, ī waitou tunī ganan neid soosi tamo.

Herod

Nu Testamen bun, are tamo aiwa adodo fire fire anī Herod dedig:

1. King Herod ī anī, Herod Odug dedig, Jesus wō yen sain anī bun, Judia distrik bun king ibodon. Im anī Jesus momou mog, yukesiyouf nigin age fen (Matyu 2:1-22; Luk 1:5).
2. Jesus biya od wogōya ado memelik inodin sain anī bun, Herod Antipas anī, Galili distrik nē uyu irouya ibodon. ī de anim anī Herodias yale fen, naan igunēdiya tamo Jon nē mudur gudū fen. Jesus Pailat nē kot bun ifaren sain anī bun, Herod ī es fiyēf nigin wagen diroulen (Mak 6:14-29; Luk 23:6-12).

Enei Bun Ifaredif Nē Fadedya Hibru xv Enei Bun Ifaredif Nē Fadedya Isip

3. King Herod Agripa I ī, sios uruwa bun idi Jesus Kristus nigin momoi den anidi darau ifenēdin. ī, Jon nē tura Jemseg yukesin (Aposel 12:1-23).
4. King Herod Agripa II ī anī Pol nē od es fe fen, ī Sisa wagen es fiyēf nigin Rom sur fiyen (Aposel 25:13-26:2, 26:19, 27-32).

Hibru

‘Hibru’ nē gariya are ‘Juda’ de tekelei. Tamo kayau idi Hibru difiyēdif are idi Abraham nē ibor. Yana anī nedī tubuid tar taka bunem isin, ī anī Eber dedig. Od Juda idi dirōdig anīg, Hibru dedig.

Hosiana

Od Hosiana, are aanya anī tamo kayau, tamo be kayau be taka suma bun yana odug difenēf nigin kakaī yei yeya anī agei difedig. Anī nē gariya, are “Negur sā ī isennēf!” be, “Negur yana taleseg.”

Isak (Aposel 7:8; Rom 9:7; Hibru 11:9)

Isak ī Abraham Sara ado neid kesu. In yana nē gariya are kasā. Abraham bun ulouf.

Isennēyā Tamo

Jesus ī ‘tenebur enei nē Isennēyā Tamo’ dedig, ere nigin, ī tamo kayau idi dalouf nē kaffi fiya bun tamal diyawauf nigin naab anī kā fen. Jesus laaf fen, tamo kayau ganan nigin ye fen kaffi fiya anī yalen, anī nigin, Negur idi ī nigin momoi def anidi ganan neid mosor nigin weder tu keledidig. Negur Jesus nigin ye fen, idi madur bagai gen iledidig.

Isip

Enei Bun Ifaredif Nē Fadedya IsraelxviEnei Bun Ifaredif Nē Fadedya Jesus

Isip are teneub takā Israel non ibodok anī. Israel tamo kayau 400 yar Isip oun ferfer difaren (Aposel 7:34-38).

Israel

Israel yana anī, are Negurem Jakop ifenen, ī Isak in aiwa Rebeka ado neid kesu uru atun takā anī.

Israel nē ibor are yeneid tunī wogōya fire fire bunem dirōdig. Idi anī, ‘Israel nē tamo kayau’ dedig, dum idi ‘Juda’ dedig, age de feneg, idig ‘Hibru’ dedig. Juda bun ulouf.

Teneub Israel tamo kayau dibodok nē an, anīg Israel dedig. Uruwa bun, teneub are Kanan dedig. Gamag teneub anī Palestin dedig.

Jakop

Jakop de tamo tekelei Israel anī. ī ne kesu monog tuwelf anidi adon, idi anī Israel nē ibor tuwelf nē tubuid tar. Abraham bun ulouf.

Jepta (Hibru 11:32)

Jepta ī kusī tamo odug takā. Sain taka bun, ī Israel tamo kayau neid uyu irouya tamo ibodon.

Jeremaia (Matyu 2:17, 16:14, 27:9)

Jeremaia ī Negur nē propet takā. ī, Kristus kel yaleya tamo Negurem sur fe di, isi youf nigin promis od iron anī isiyouf sain bun, ereb musei wō youf anī nigin profet od wogō yen.

Jesi (Matyu 1:5-6; Luk 3:32; Aposel 13:22; Rom 15:12)

Jesi ī King Dawid ne tama, anī Jesus Kristus nē tubu. Kulu bagai, propet Asaia, Jesi ado Dawid nē ibor bun tamal Kristius wō youf anī nigin itoton.

Enei Bun Ifaredif Nē Fadedya JonaxviiEnei Bun Ifaredif Nē Fadedya Josef

Jesus

Jesus yana anī nē gariya, are “Kel yaleya tamo,” oo “Neda Negur anī neda Kel Yaleya Tamo”. Yeneid tunī Jesus nigin wogō dedig are: Jesus Kristus, Negur Naal, Tamo Naal, Dawid Naal.

Jona (Matyu 12:39-41, 16:4; Luk 11:29-32)

Jona ī Negur nē propet taka. Sain taka bun, Negur in biya od wogō youf nigin, taun taka Niniwe dedig bun an ī sur fiyen. Anī are, Jona modoū taka bun ileya nigin ye fen, waag taka bun sō yen. Sain ī waag bun ibod mog, Negur yau uyē ado odug bagai sur fen. Tamo kayau waag anī bun difaren idi, Jona bunem yau uyē ado odug bagai wō yen anī kelein. Anī nigin, idi ī maaīwō diran. Gau odug takam ī yakalaisile di, ī gau te namen naa towo ibodon, age fe di, gau ī, Jona teneub bun ilu iran. Anī bure fele di, Jona Negur nē od dōf fen, Negur nē biya od wogō youf nigin Niniwe taun ilen.

Josef

Nu Testamen bun, tamo yeneid Josef dedig tunī difaref.

1. Josef ī, Jakop nē gere tar tuwelf anidi taka, Jakop nē gere tar tuwelf anidi Israel tamo kayau neid tubuid tar. Josef ī anī Benjamin nē tura (Aposel 7:9-14; Jon 4:5; Hibru 11:21, 22; Revelesen 7:8).
2. Josef taka, are Maria ne tamo.
3. Josef taka, are Jesus nē tura tar anidi taka (Matyu 13:55; Mak 6:3).
4. Josef taka, are Jems taka, Jems tura naal dedig anī nē tura (Matyu 27:56; Mak 15:40,

47)

5. Josef, Arimatea tamal, are safina musei ado tamo, ī Juda uyu iroudiya neid kaunsel guru fiya anidi taka. ī tamo biya fen, Jesus Kristus dō fiyēdig (Matyu 27:57-60; Mak 15:42-46; Luk 23:50-53; Jon 19:38-42).
6. Josef Basabas ī (Aposel 1:23) Jesus Kristus nē dō fiya tar taka, ī Jesus geiden. Sain idi Judas ne modoū fotokar, tamo taka aposel wō youf nigin digirin, idi Josef ado Matias atun aisai diran. Are, Matias ī anī digirnen.
7. Barabas ī anīg, Josef dedig (Aposel 4:36).

Josua (Aposel 7:45; Hibru 4:8)

Moses laa fe di, Josua im anī Israel tamo kayau neid uyu irouya wō yen. ī Kanan teneub bun idi guri feid iroulen, teneub are, Negur idi ifenēdiyouf nigin promis od iron anī. Age de fen, idi tamo kayau an difaren anī kusī bun wawal difedin. Josua ī teneub anī foif fen, Israel nē ibor tar mugu mugu bun teneub morou morou anī ifenēdin, anī are, Lewi ne ibor idi pris kabī dalouf nigin igirnēdin anidi dogol teneub taka morowouf nigin ifenēdiya sā. Josua ī uyu irouya odug wō ye fen, tamo kayau waud tekelei ado Negur dō difouf nigin totol od irokenēdin. ī iron, “Neu tamo kayau ado aya nagineg, amā Negur dō mafouf,” yen.

Juda (Hibru 7:14, 8:8; Revelesen 5:5, 7:5)

Juda ī Jakop ne gere tar tuwelf anidi taka. ī Juda ibor dedig anī nē tubuid. Teneub in tubuid tar difaren are Judia dedig, teneub anī bun, taun Jerusalem dedig anī ibodok. Jesus Kristus

Enei Bun Ifaredif Nē Fadedya Juda Tamo Kayauxix Enei Bun Ifaredif Nē Fadedya Kamel

Ĩ Juda nē ibor bun tamal wō yen.

Juda Tamo Kayau

Tamo kayau idi Juda dedig, are Abraham nē ibor tar. Abraham bun ulouf.

Gariya bun, Juda yana nē gariya are, “tamo kayau idi Juda nē teneub bun difaref anidi,” are tamo kayau Juda nē ibor bun temeleid. Juda ibor anī Israel neid ibor tuwelf anidi taka. Anī are, dum Israel tamo kayau ganan nigin yana ‘Juda’ anī dirōdig. Israel bun ulouf.

Jon nē biya od bun, Jon yana Juda anī wogō yedig, are Juda neid uyu irouya tar nigin ye fen age fedig.

Kaa Sane

Kaa sesen anidi, are Satan nē dō fiya tar. Idi uur anidi anī, tamo morō difenēdi di, tamo kayau idi Negur nē od wal dife fen, Satan dō difouf nigin age difedig. Sain tunī, idi tamo dirounēdig, are tamo ĩ Satan nē kabī ado ereb sane bun ilauf bun, age difedig.

Kain (Hibru 11:4; 1 Jon 3:12; Jud 11)

Kain ĩ, Adam Eva ado neid kesu matu. ĩ yogon tura naal are ĩ Abel dedig anī nigin fatuk bagai kiyeĩ inon, ere nigin, Negur ĩ, Abel nē sipsip sesewi fiya anī de yen, anī ere, Kain nē saaf kabier tamal sesewi fiya are itoron. Anī nigin, ĩ Abel yukesin. Enei nigin, Negur ĩ iron, Kain ĩ fau de teneub ganan bun iyokesi di, tamo kayau ganan ĩ dudum difiyēf.

Kamel (Matyu 3:4, 19:24; Mak 10:25; Luk 18:25)

Kamel are gaar odug taka anī, tamo kayau teten dibod ken, diyōdig. ĩ morō odudugeg faali

Enei Bun Ifaredif Nē Fadedya KananxxEnei Bun Ifaredif Nē Fadedya Lewi

fedig. Sain tunī kamel nē siwi anim kolos didi ado dinodig.

Kanan (Aposel 7:11, 13:19)

Kanan are teneub yana, anī Negur ī, Israel tamo kayau nedī teneub ouf, anī ifenēdiyouf nigin promis od irokenēdin. Gamag, teneub anī, are Israel dedig. Sain tunīg, are Palestin dedig.

Koban (Mak 7:11-12)

Koban dedig, toboununā anī nē gariya taka to kelein, anī ere, erek nigin irok anī, Mak nē itotoya 7:11-12 bun ibodok dogol.

Kora (Jud 11)

Kora ī, Moses ado Aron kiwai ifeneīd fen, kusī uyu iroun. Anī nigin, Negur fatuk bagai name fen, teneub anī bagā ye di, Kora ado idī ganan ī dō difen anidi itob le nēdin.

Kristen (Aposel 11:26, 26:28)

Kristen nē gariya, are tamo taka ī Jesus Kristus dōfef anī.

Kristus

Inglis od bun, Kristus anīg Mesia dedig. Od Kristus, are Grik od nem, od Mesia, are Juda neid od nem. Od gariya are tamo ī mudur bun moul fi difelef anī. Ere nigin, enei are, kulu bagai, sain Negur Juda neid king taka age fiya igirnek, idi ī moul mudur bun fi difelegid, uris taka gen, ī king wō youf nigin. Negur yogen tamo kayau kel gei fediyouf nigin, isennēya taka sur fouf nigin age afouf yen, agef fen, tamo anī irou isiyouf. Tamo enei, are Kristus dedig, ere nigin, tamo anī, Negur igirne ken bagai sur fen.

Enei Bun Ifaredif Ně Fadedya Lo xxi Enei Bun Ifaredif Ně Fadedya Lot

Lewi (Hibru 7:5, 9, 10; Revelesen 7:7)

Lewi ī Jakop ne gere tar tuwelf anidi taka, Jakop ne gere tar tuwelf anidi Israel ibor tuwelf nē tubuid tar. Lewi ne ibor tar, temple bun Negur nē kabī dalouf nigin igirnēdin. Lewi ne ibor tar bun, pris anidi igirnēdin, are Lewi ne ibor bun, Aron nē ibor bun temeleid pris anidi igirnēdidig. Aron bun ulouf.

Jesus ne dō fiya tar taka īg Lewi dedig. ī yana taka are Matyu (Matyu 9:9-13; Mak 2:14; Luk 5:27-29).

Lo

Negur nē lo are, Buk Baibel bun buk faif uyulil ditoton bun yenek. Lo eneidi, Negur in tamo kayau nigin ye fen, anī Moses bun yaor fen.

Lo Ifelnēdiya Tamo

Lo ifelnēdiya tamo idi, lo Negur ī Juda idi nigin Moses ifenen anī tamo kayau difelnēdidig. Idi Moses nē buk faif bun od ditotodin anidi bagai difelnēdidig. Lo, Moses bun ulouf.

Lot (Luk 17:28-32; 2 Pita 2:7)

Lot ī Haran ne naal, Haran ī Abraham ne tura naal. Abraham bun ulouf. Sain Abraham teneub mata Negurem afonōf yen anī imiref nigin ilen, Lot ī ado dilen. Idi teneub anī bun dile fen, sain taka bun, Lot Sodom taun ibodōf nigin ilen. Taun anī nē tamo kayau ereb ereb sesen musei age difedig. Anī nigin, Negur ī Sodom taun daūfouf nigin iron. Negur ī Lot taun anī bun tamal iyawouf nigin weder irowauf nigin in engel sur fen. Lot in ibor tar geid taun anī ditoron, idi ditor dilele di, Negur taun anī yā nem daūfelen. Idi taun ditor dilel

Enei Bun Ifaredif Nē Fadedya Maaī GiriyaaxiiEnei Bun Ifaredif Nē Fadedya Melkisedek

mā, idi dumedin to lo difouf nigin, engel Lot irokenen, anī ere, Lot aiwa falei yel, dumen lo fen, kaisā bagai, kayau ī sol nem tamo nē malakanon inoya anī gen falei felen.

Maaī Giriya

Maaī Giria are Israel ado Isip atun yenek. Moses bun ulouf.

Mana (Jon 6:31, 49; Hibru 9:4; Revelesen 2:17)

Kulu bagai, Israel tamo kayau Isip bun tamal diyalelen sain anī bun, idi gerere tuan yar foti diyokesin. Sain anī bun, Negur idi saaf ifenēdin. Saaf enei mana dedig. Naa mugu mugu bun, saaf enei saa ilunem tenebur kuku redig, anī ere, Sabat naa bun sā. Age fe di, tamo kayau dile saaf enei kuru difedig. Saaf enei Eksodas 16:13-36 bun es fe faded fef.

Masted (Matyu 13:31-32, 17:20; Mak 4:31-32; Luk 13-19, 17:6)

Masted are aa taka, in faat anidi nanaal bagai. Anī ere, ī odugouf are, aa odug gen, odug bagai wō yedig.

Melkisedek (Hibru sapta 5-7; Sam 110:4)

Ada Melkisedek nigin tutuk bagai keleī sā, anī ere, Hibru sapta 5-7 nē itotoya bun ereb yef anī dogol keleī. Jenesis 14:17-20 nē itotoya bun, sain taka bun, kiwai tamo idi disi fen, Abraham ne tura nē naal Lot, in ibor tar geid, nedī safina ganan ado dirouneīd fen, lei difedin. Anī nigin, Abraham ile fen, kiwai tamo kusī bun wal feid fen, Lot ado yogon safina ganan kel gei fedin. Sain Abraham kel isi mog, Melkisedek ī naabur fotou fiyen. Melkisedek ī, bret ado wain, Abraham ifen ken, Negur ī bun biya age fef anī

Enei Bun Ifaredif Nē Fadedya MesiaxxiiiEnei Bun Ifaredif Nē Fadedya Moses

de age fe tobol fouf nigin kosē ye, el fiya ifenen. Abraham ī, safina ganan kusī bunem gei fedin anī nē ten tekelei Melkisedek ifenen, age fiya gen, dum, Israel tamo kayau nedī safina ganan bun ten tekelei anī pris idi age de difenēdigid. Anī nigin, Buk Hibru bun, Melkisedek īg pris taka yef. Dum, Negur, Israel tamo kayau neid pris anidi Lewi nē ibor bun tamal digirnēdiyout yen. Anī ere, sain Melkisedek ī, Abraham fotou fiyen, Lewi ī Abraham nē ibor, fau wōya sā mog. Anī nigin, Buk Hibru nē itotoya bun, sain Abraham in safina ganan bun, ten tekelei anī Melkisedek ifenen, are Lewi ne ibor bun temeleid pris ganan dogo neid ten tekelei anīg Melkisedek difenen gen ileyauf yen, ere nigin, dum idi Abraham bunem wō douf.

Mesia - Kristus bun ulouf.

Moses

Moses ī, Israel tamo kayau neid uyu irouya odug. Israel tamo kayau Isip nē ferfer difaren sain anī bun, Negur ī, Israel tamo kayau uyu iroukenēdi di, idi Isip bun tamal diya fen, teneub Negurem idi ifenēdin anī bun ke douf nigin, Moses igirnen. Negur naab fire bagai bun, Moses fotou fiyen. Moses, aa taka yā uu ye mog anī ilen, anī ere, uu ya san. ī modoū anī bun Negur ibodok ya anī kelein. Age fe di, Negur ī wogō fiye ken, ī yogon tamo kayau uyu iroukenēdi di, nedī teneub bun ke de dilauf nigin Moses igirnen anī ī irokenen.

Negur ī, Moses bunem ereb biya bagai musei age fedin. Sain taka bun, Isip tamo, Israel tamo kayau dirudidi di, idi maaī taka, Maaī

Giriya dedig bun disin sain bun, Negur naan wī yef anī dē yalouf nigin age fe di, naan anī garaī taka gen ifare di, tamo kayau teneub gere keleya bun diyok dilen. Idi dibal dilele di, Isip tamog dibalauf nigin age difen, anī ere, naan baban wī ye fen, idi kerub fedin, age fe di, idi dimutatakesin.

Negur ī, yagon lo, Israel tamo kayau nigin ye fen, Moses ifenen. Sain idi gerere tuan diyō mog, naa taka bun, Moses arei Sinai dedig anī bun ibod ken, Negur bun kosē youf nigin an iselen. Negur yogo Moses bun yaor fe fen, in ītāfiya anidi ī irokenen. Negur ītāfiya ten odug bagai anidig, meein uruwo bun itotodin, meein eneidi anī, Negur nē salafat namen modoū fateul anī bun dinodin. Moses ī Sinai arei bunem isi bure fel fen, ī ītāfiya ganan itotodin. ītāfiya eneidi are Buk Baibel bun buk faif uyulil ditoton anidi, are 'Moses ne buk' dedig anī bun dibodok; eneidi are Jenesis, Eksodas, Levitikas, Namba ado, Diuteronomi. Lo buneg ulouf.

Mosor

Tamo taka Negur nē ītāfiya anī taka be ifodoulouf, are anī mosor. Are tamo nē lo fiya bun, safina naal be odugeg, anī Negur mala bun fau de mosor.

Moul Aa Bun Tamal Sumeī Biya, Mer
(Myrrh) (Matyu 2:11; Mak 15:23; Jon 19:39; Rev-elesen 18:13)

Moul aa bun tamal sumeī biya, Mer, are safina taka, anī moni odug bagaim naa sur difedig, ī sumeīg meli bagai. ī aa taka nē gaula anī dale fen, anī dinodig. Juda idi anī

Enei Bun Ifaredif Nē Fadedya Mulū Ileyaxxv Enei Bun Ifaredif Nē Fadedya Naan Igūya

nem marasin dinodig, marasin are tamo darau odug bagai to yalouf nigin, ī yenēya nigin age fedig. Idi laa tamo nē bouwa buru mū difouf nigin dodok difouf nigineg marasin anī kabī difenēdig.

Mulū Ileya

Juda neid tobonunā bun, idi kesu monog ganan gogū difef, are naa eit ilele di, idi bouwa gudū fiya anī age difedig. Are Negurem enei idi age difouf nigin Abraham irokenen. Jenesis 17:9-14 bun ulouf.

Mulū ileya are, tamo ī Juda tamo yeya anī nē uris. Juda tamo kayau nigin ‘idi mulū ileya bun temeleid’ dedig.

Sain tamo kayau biya od uyulil wogō den, Juda tunī an, idi eig den, tamo taka ī Juda sā anī, ī kristen taka wō youf nigin oro fouf are, ī uyulil mulū ilauf. Enei anī ī Juda tamo yeya anī nē uris, age fe di, dum ī kristen taka wō youf. Pol anī to yo yen. ī Galesia sios tamo kayau bun, pas anī nigin itotodin, ado modoū musei tunī buneg. ī iron, tamo taka ī isennēya yaleya nigin oro fouf are, ī safina tekelei dogol de age fouf, are ī Jesus Kristus bun momoi youf dogol.

Naan Igūya

Buk Baibel nē itotoya bun, are Jon ī tamo kayau musei Jordan naanū naan igunēdin. ī idi irokenēdin, are idi nedī mosor bun tamal de waud falei ye fen, naan digūwauf, anī bunem, are idi waud falei yen anī, ganan keleī youf.

Tamo kayau idi Jesus Kristus nigin momoi def anidi atun, naan igūya are, aib taka ī kristen

taka wō yef anī tamo kayau ifelnēdif nē uris.

Naan igūya nē gariya are:

- (a) Aib taka ī naan igun, are ī mosor inodin anī bun tamal wau falei yen.
- (b) ī, Jesus Kristus aib aib idi ī nigin momoi def anidi neid mosor nigin weder tu kalauf yen anī nigineg momoi yef.
- (c) ī Jesus Kristus dō fiya nigin ado, ne od dō fiya nigin oro fedig.

Nad (Mak 14:3; Jon 12:3)

Sain taka bun, kayau taka, Jesus ye bun wā̄ fouf nigin moul irou isin. Moul enei nad bunem dinon, nad are aa spikenard dedig anī nē sumin.

Naman (Luk 4:27)

Naman ī kusī tamo neid mudur taka nē yana, ī Siria kantri bun tamal. ī Juda tamo sā. ī kusī tamo odug bagai, anī ere, ī lepra guruma ado. Sain taka bun, ī profet Elisa bun ile fen, ī lepra guruma bun tamal el fiyēf nigin to fiyen. Elisa ī Jordan naanū ile fen, ī yogo sain seven naan igūwauf anī irokenen. Naman dōf age fen, age fe di, ī bouwa el fe biya len.

Negur Nē Sipsip Naal

Jon 1:29, 36 bun, Jon naan igunēdiya tamo, Jesus nigin, “Negur nē sipsip naal” yedig. Juda neid toboununā bun, idi sipsip naal taka, Negur nedī mosor weder tu kalauf nigin, sesewi fiya nigin tō dife issaikaledig. Sipsip naal nē naud anim, Negur nē lo fiya bun, idi fateul inenēdig. Jesus ī Negur nē sipsip naal dedig, ere nigin, ada sā neda mosor nigin weder tu keleya anī

Enei Bun Ifaredif Nē Fadedya Negur Nē TempelxxviiEnei Bun Ifaredif Nē Fadedya Noa

talouf nigin, ī yogon mata sesewi fiya taka gen
anī ifenen.

Negur Nē Tempel

Negur nē Tempel anī Jerusalem, Israel nē taun odug an ibodon. Modoū enei are Juda idi an dile, sifa naa odug sigigi dife fen, sesewi fediya ado ofa anidi Negur bun dinodig.

Tamo kayau Juda sā anidi tempel nē mayaī mayarē dogol diledig. Tempel namen bagai an, idi Negur nē safina fateul anidi dinodig. Yar ganan bun sain tekelei dogol, pris mudurem dogol modoū anī bun iledig. Gabar odug taka modoū fateul bagai anī nē bobog ileyā bun dinolelen. Gabar enei anī, Jesus laa fen sain bun, muduronem serek fe isil ye bunen (Matyu 27:51; Mak 15:38; Luk 23:45). Enei are, sain anī bunem, tamo kayau ganan Kristus nigin momoi douf are, Negur idi ī wagen ileyā nigin naab anī kā fen anī ifelnadaf.

Niniwe (Matyu 12:41; Luk 11:32)

Niniwe are taun yana, anī bun Negur profet Jona in biya od wogō youf nigin sur fen. Buk Jona bun ulouf. Negur in od are eig fiya, idi ereb sesen anidi age difedig nigin, ī idi daū fediyouf. Sain idi od enei karī den, idi maruid isi fen, waud falei yen. Anī nigin, Negur idi neid mosor nigin weder tu kel fen, idi to daū fedin.

Noa (Matyu 24:37-38; Luk 3:36, 17:26-27; Hibru 11:7; 1 Pita 3:20; 2 Pita 2:5)

Noa ī kulu bagai ibodon. Tamō nē ibor Adam bunem garia inon, ī are namba nain ibor. Sain Noa tenebur ibodon, tenebur tamō kayau ganan ereb ereb sesen musei age difedig.

Anī nigin, Negur ī, kuwei odug taka sur fe di, tenebur tamo kayau ganan ado ereb ereb ganan tenebur difaref anī daū fediyouf nigin iron. Anī ere, Noa ī tamo biya, ī Negur nē od dō fedig. Anī nigin, Negur Noa waag odug taka inouf nigin irokenen, Negur ī irokenen kilei bagai, waag age inouf nigin irokenen. Negur Noa in aiwa ado gere tar towo, nedī aiweid tar weim waag namen dilauf nigin irokenen, idi weim, gar, ninā fire fire bun monog tekelei ado gober tekelei, anī ere, gar, ninā tunī bun monog sewen ado gober sewen weim waag namen dilauf nigin irokenen. Noa ī, Negur od iron anī nigin momoi ye fen, ī Negur od ī irokenen kilei bagai age fen. Noa in tamo kayau geid waag namen dilele di, Negur uyē odug sur fen, age fe di, kuwei odug ilen. Arei mudu gananeg naan kerū feledin. Tenebur tamo kayau tunī ganan dimutatakesin, anī ere, Noa ado in ibor tar are kel gei fedin.

Ogō musei ilele di, naan isilelen, age fe di, teneub baban sagau kelen. Anī nigin, Noa in tamo kayau geid waag bun tamal kututū desin. Age dife fen, Noa Negur bun sesewi fe fen, ī yana yalesen, ere nigin, Negur idi isennēdin nigin. Negur baban kuwei taka age fiya, ī age fe di, to wō youf nigin promis od iron. ī walol are yogon promis od nē uris ye fen, promise od eig fiya wogō yen, are sain enei bunem ilauf ganan bun, an naa, bō, uyē saniya, gaa saniya, ifaya nē sain ado kusu fiya nē sain anidi ibodōf yen.

Paradis (Luk 23:43; 2 Korin 12:3; Revelesen 2:7)

Enei Bun Ifaredif Nē Fadedya PasaxxixEnei Bun Ifaredif Nē Fadedya Profet

Paradis nē gariya are 'kabī meli bagai.' Modoū meli bagai Iden, are gariya bun Negur Adam ado Eva an inenēdin anī nigin Paradis dedig. Anī ere, Nu Testamen bun, Paradis nē gariya, are saa tano nē gariya de tekelei, are modoū meli bagai an tamo kayau Jesus Kristus nigin momoi den anidi, dum idi gare douf bun, dilauf.

Pasa - Sifa Naa bun ulouf.

Pentikos - Sifa Naa bun ulouf.

Pris

Pris idi Israel tamo kayau nigin de fen, Negur bun sesewi fiya difenēdiyout nigin Negurem igirnēdin anidi. Jesus nē sain bun, idi Jerusalem Tempel bun sesewi fiya difenēdidig. Pris idi Aron nē ibor bun digirnēdidig (Aron bun ulouf), are Lewi nē ibor tar atun Aron nē ibor bun temeleid. (Lewi bun ulouf).

Pris mudur ī, pris idi atun odug bagai. Pris mudur ī, yar tekelei nē dogol ibodōf nigin digirnēdidig, age de fen, anī baban pris takā digirnēdig. Pris mudur im dogol Tempel nē modoū fateul bagai namen illedig, are yogon mosor ado tamo kayau neid mosor yaleleya nigin Negur bun sesewi fiya ifenēf nigin age fedig.

Pris atun pris odug dedig anidig dibodon. Pris odug idi are, pris mudur, pris ganan kulu pris mudur dibodon anidi ado, tamo yeneid adodo pris nē ibor bun temeleid anidi.

Profet

Profet are tamo takā ī, od Negur ī bun yaor fe irokenen anī wogō yedig. ī Negur nigin ye fen, od tamo kayau bun wogō yedig.

Enei Bun Ifaredif Nē Fadedya RabixxxEnei Bun Ifaredif Nē Fadedya Rahel

Uruwa bun, Negur profet musei sur fedidin, are Samuel, Asaia ado Jeremaia age fediya. Idi bunem, Negur dum bun ereb wō youf anī nigin neg yaor fen. Yar musei Jesus Kristus fau wōyā sā mog, idi in isiya nigin, ereb ereb musei ī age fediyouf nigin ado, ereb ī bun wō youf anī nigin diron. Idi, Jesus Kristus tenebur tamo kayau es fediyouf nigin, fau baban kel isiya sā mog, ereb ereb musei teneub enei nē idikeleya naa bun wowā youf nigin neg diron.

Rabi

Rabi are yana Juda idi tise odug bagai be idi atun uyu irouya anī bun difenēdig. Tamo aib ī kisi biya ado fen, yana adouf are, ī Rabi difiyēdig. Rabi yana taka are Raboni, anī nē gariya Rabi de tekelei.

Rahab (Hibru 11:31; Jems 2:25)

Kulu bagai, sain Israel tamo kayau, teneub Negur idi afenēdiyouf yen anī bun dilauf nigin age difen, idi, tamo kayau teneub anī bun difaren anidi dile fen, naig de idi wal difediyouf nigin kisi dalouf nigin kofo tamo sur difedin. Rahab naabur kayau taka bouwa na sur fedig, ī teneub anī bun ibodōdig. Sain Israel kofo tamo an disin, kayau ī, idi isenneīd fen, idi inokolnēdin, ere nigin, kayau ī, Israel tamo kayau teneub de anī dalouf anī Negur nē oroya ye fen, momoi yen. Anī nigin, sain Israel tamo kayau teneub anī nē tamo kayau wal difedin, idi Rahab to dukesin, anī ere, idi, taun anī bun tamo kayau tunī ganan didenkesin. Kayau Matyu 1:5 bun irok anī, kayau de tekelei be, are ī de Jesus nē tubuid tar taka.

Enei Bun Ifaredif Nē Fadedya RebekaxxiEnei Bun Ifaredif Nē Fadedya Sabat Naa

Rahel (Matyu 2:18)

Rahel ī, Jakop ne kayau tar anidi taka, ī nigin Jakop wau fatuk bagai laa fedig. Rahel ī Josef ado Benjamin ado sineid, are Juda tamo kayau neid sineid tar ganan anī im ifaref.

Rebeka (Rom 9:10-13)

Abraham ne naal Isak ne kayau anī Rebeka. ī, Esau ado Jakop, idi urom aina anidi neid sineid. Esau uyulil wō yen, anī ere, Jakop im anī Negurem ī uyulil wō youf nigin igirnen, age fe di, ī bunem Juda idi ibor wowā den. Esau ado Jakop bun ulouf.

Rom

Rom are kantri Itali dedig anī nē taun odug. Jesus tenebur ibodon sain anī bun, Rom nē tamo kayau teneub tunī musei kusī bunem lei difen. Idi Israel anīg wawal difeid fen, Israel tamo kayau anī ulum dirounēdin. Anī nigin, Israel tamo kayau, Rom idi to oroid fen, nedī teneub bun idi dalelnēdiyouf nigin waud yenēn. Rom nē king, are Sisa dedig ī, sain anī bun, teneub ganan atun king odug bagai ibodon.

Sabat Naa

Sabat naa are naa odug bagai. Jenesis nē Buk bun ditoton are eig yef, Negur naa sigis anidi bun teneub kare fen, agef fen, naa sewen bun ī si inon, ere nigin, in kabī are bure felen. Negur iron, tamo kayau de naa sigis anidi bun dogol kabī dalouf, age de fen, naa sewen bun idi de si dino fen, Negur yana dalesauf.

Juda idi Sabat naa nigin lo musei adon. Idi dirōdig, tamo kayau de naa anī bun ereb kabī

taka to dalouf, age de fen, tamo kayau lo anī difodulouf are, idi fatuk bagai namedidig. Age fiya nigin, sain Jesus Sabat naa bun tamo taka dagi ado el fiyen ado, sain Jesus nē dō fiya tar Sabat naa bun kurukeis dāf nigin nonū difedin, idi anī nigin waud sanen. Idi diron, are idi kabī dalef den.

Sadusia

Sadusia are Juda idi atun yeneid adodo neid mala taka. Idi kisi difedig, are tamo kayau, lo Negur Moses ifenen anī ado Juda neid toboununā tunī ganan, tutuk bagai dō difouf dedig. Idi Juda tamo neid mala taka Farisia gen (Farisia bun ulouf). Anī ere, idi sain musei Farisia tamo geid luwa diroudig, ere nigin, Farisia idi momoi def are, tamo taka ī laaf fen, baban mata kel fā youf def, anī ere, Sadusia enei to momoi dedig.

Saion (Matyu 21:5; Jon 12:15; Rom 9:33, 11:26;
1 Pita 2:6)

Saion are arei mudu taka anī bun Jerusalem taun anī dinon anī nē yana. Tempel anī arei mudu anī bun ifaren, are modoū anī, taun ganan nē fateul bagai. Sain tunī, Saion yana are Jerusalem ganan nigin anī dirōdig. Sain tunī, Saion yana Jerusalem ilun ibodok anī nigin dirōdig, are saa tano yogo anī. Are modoū anī, Negur ibodok nē an anī nē uris. (Hibru 12:22; Revelesen 14:1)

Salafat

Kulu bagai, Israel tamo kayau gerere tuan diyon sain anī bun, Negur Moses salafat fire bagai taka inouf nigin irokenen. ī salafat anī,

Enei Bun Ifaredif Nē Fadedya SalfaxxxiiiEnei Bun Ifaredif Nē Fadedya Sara

gabar biya ado gaar gabar bunem naig fiya inouf nigin ī de tutuk bagai ī irokenen. Are an idi bar itenēya nē bokis, meein uruwo Negur anidi bun ītāfiya ten itotodin ado, Negur nē safina tunī salafat anī namen dibodok.

Juda idi salafat enei bun Negur yana dalesedig, age dife fen, idi Negur bun an sesewi fediya difenēdidig, are age ifaref ile Solomon Tempel inon sain anī bunen.

Salfa (Revelesen 9:17)

Salfa are safina bailuya takā anī, yā bale ado el fe uu ye fen, sumeñ totol ado. Anī bunem, gan nē pauða dinodig.

Sam

Buk Psalm are Negur bun yana yaleseya seg nē buk. Dawid tamo kayau tunī geid seg eneidi ditoton, are idi naig de fen, Negur nigin waud laaf fen, ī bun yana dalesef anī dirōf nign.

Samaria

Samaria are teneub akor takā nē yana. Samaria tamo kayau idi Juda tamo kayau bagai sā, ere nigin, kulu bagai, idi kayau Juda sā anidi lei difedin. Anī nigin, Juda bagai anidim idi lai difedidig.

Samson (Hibru 11:32)

Kulu bagai, Samson ī Juda neid uyu iroudiya takā ibodon. Negurem ī bouwa buru nē totol odug anī ifenen.

Samuel (Aposel 3:24, 13:20; Hibru 11:32)

Samuel ī profet odug takā. Im anī, Dawid Israel neid king ibodōf nigin moul mudur bun fi felen. ī anī tamo kayau neid uyu irouya odug takā.

Enei Bun Ifaredif Nē Fadedya SatanxxxivEnei Bun Ifaredif Nē Fadedya Sifa Naa

Sara (Rom 4:19, 9:9)

Sara ī Abraham ne kayau. Kayau ī yar musei dalin, anī ere, sain ī tubau bagai mog, ī Isak gō fen. Abraham bun ulouf.

Satan

Satan ī kaa sesen neid uyu irouya. ī Negur nē kiwai, ī tamo kayau idegnēdi di, idi sane age difouf nigin age fedig. ī tamo kayau Jesus Kristus nigin momoi def anidi, idi kulu ereb sane age difen anī nigin toku wedereid fokō fenēdi di, idi nedī mosor nigin Negur weder to tu kelen gen kisi difouf nigineg age fedig. Satan ī anig ‘Devil’ oo ‘tenebur enei nē king’ dedig.

Sifa Naa

Sifa naa are naa tunī odudug anī bun, Juda idi yar ganan bun sigigi difedig. Sifa naa enidi bun, idi Negur nē biya fiya ado kulu Negur idi nigin ereb age fedin anī nigin kisi difedig. Sifa naa nē yana tunī are eig fiya:

Tempel Mata Negur Ifenēyā Nē Sifa Naa (Jon 10:22)

Sifa naa enei bun, Juda idi, kulu bagai, tamo taka Judas Makabius dedig ī, Negur nē Tempel haiden idi amuyē dinon anī amuyē sā ino fen, tamo kayau an Negur yana dalesauf nigin Tempel dodok fen anī karī deledig. ī enei age fen, ere nigin, urug tamo idi ado kiwai tamo anidim, Tempel bun dile fen, amuyē dinodin.

Juda idi sifa naa enei nigineg age de dirōdig, ‘Lalan nē Sifa Naa’. Age fiya nigin, sain anī bun, Jesus iron, “Aya teneub enei nē Lalan.” (Jon 9:5)

Pasa Nē Sifa Naa (Matyu 26:2, 5, 17-19)

Pasa nē sifa naa dedig are Juda idi nigin, sifa naa odug bagai. ‘Pasa’ yana nē garia, are wawal fiya. Sifa naa enei bun, Juda idi, kulu bagai, Isip nē kafī fiya teneub bun tamal, naig de diyalelen anī karī deledig. Sain anī bun, Negur, Isip neid fō mugu mugu bun kesu monog matu idenkesidiyouf nigin in engel sur fen. Anī are, ī Juda neid fō mugu mugu bun idi sipsip naal taka dukeis fen, sipsip naal nē naud anī sukar nē tor bun ororo difediyouf nigin irokenēdin. Age dife di, sain engel naud anī ile fen, ī fō anī wal fen, agef fen, an kesu taka to yukesin.

Anī nigin, Pasa nē sifa naa bun, Juda idi, fō mugu mugu bun, sipsip naal taka dukeis fen, weim sipsip naal dō don.

Bret Yis Sā Nē Sifa Naa

Bret yis sā nē sifa naa are, Pasa nē sifa naa de anī bun, Juda idi sigigi difedig. Sain Juda idi Isip teneub bun tamal diya dilelen, idi tari fiya nigin sain taka sak ile, idi bret fau to gē ye mog anī yā bun dinodig. Anī nigin, sifa naa enei bun, Juda idi, bret yis sā anī dō don.

Salafat Nē Sifa Naa (Jon 7:2-52)

Sifa naa enei bun, Juda idi kulī dedig, ere nigin, saaf kusu fiya anī mogo kisi felen. Idi salafat dinoid fen, uub tekelei sifa naa nigin an difaredig, age fe di, idi naab anī bun, nedī tubuid tar Negur idi teneub afenēdiyouf yen anī fau yaleya sā mog, idi gerere tuan 40 yar diyo ken, salafat bun dibodon anī karī deledig.

Pentikos Nē Sifa Naa (Aposel 2:1, 20:16; 1 Korin 16:8)

Enei Bun Ifaredif Nē Fadedya SinaixxviEnei Bun Ifaredif Nē Fadedya Sipsip

Pentikos nē sifa naa anīg are Juda idi nigin sifa naa odug bagai. ‘Pentikos’ yana nē garia are fifti. Juda idi, Pasa naa wō ye naa fifti ilele di, sifa naa enei sigigi difedig.

Pentikos nē sifa naa bun, Juda idi wit kususu fiya nigin sigigi difedig. Juda idi, kulu bagai, Negur Sinai arei bun Juda idi nigin Lo anī Moses ifenen nagineg karī deledig. Gama, Pentikos are Kristen tamo kayau, naa enei bun Awa Uur Fateul uyulil tamo kayau Jesus Kristus bun momoi den anidi bun isin anī nigin karī deledig. (Aposel 2:1-4)

Sinai

Sinai are arei mudu taka nē yana, an Moses ibodon sain, Negur in ītāfiya ī ifenen. Moses bun ulouf.

Sinamon (Revelesen 18:13)

Sinamon, are aa taka nem dinodig. ī sumeī meli bagai fen, ī na yaleya nigin moni odug bagai. Tamo kayau moul sumeī meli bagai youf nigin, anī moul ado falei difedig, moul anī, tamo kayau mudureid bun fi difelediyouf nigin age difedig, are sain tunī tamo laa fen anī bouwa buneg inoya nigin age difedig.

Sipsip

Baibel nē sain bun, Juda idi sipsip kulatun fiya nē suma age difedig are eig fiya:

1. Sain anī bun, tamo tekelei sipsip mu-sei kulatun fedig. Idi taun bun to difar genēdig, anī ere, tamo kayaum dubur idi guri difeid dirouledig, are modoū fisir musei biya ifaredif nē an sipsip idi dāf nigin dinenēdidig.

Enei Bun Ifaredif Nē Fadedya SisaxxviiEnei Bun Ifaredif Nē Fadedya Solomon

2. Tamо tunī sipsip idi kulatun fediya nigin dub anī bun sipsip geid weim difaredig. Tamо eneidi, sipsip nigin keleī bagai. Idi sipsip mugu mugu keleīdig.
3. Tamо sipsip kulatunfef, are de modoū taka ganan kau ifokeleya ado anī dodok fedig. Bō sain, idi sipsip ulum dirou fen, an dinenēdig, anī bunem, ereb takam idi to daū fediyouf. Tamо sipsip kulatun fedif, ī de an garaī bobog bun yenēdig. Sain tunī, bē tamо taka, sipsip taka bē yalouf nigin kau gar yeis kutū yesiya nigin age fedig.
4. Juda idi, Negur bun sipsip sesewi fiya anī difnēdig. Negur nē sipsip naal bun ulouf.

Sisa

Sisa ī, are Rom tamо kayau neid king nē yana. Rom tamо kayau teneub ganan kusī bunem wawal difeid fen, uyu diroun. Sisa ī, idi ganan anī nē odug. Rom tamо kayau neid king ilun difaref ganan anī, are Sisa dedig.

Sodom (Matyu 10:15, 11:23-24; Luk 17:29; Rev elesen 11:8)

Sodom are taun taka Lot ibodon anī nē yana (Lot bun ulouf). Taun taka Gomora dedig anī Sodom taun non ifaren. Sodom ado Gomora taun neid tamо kayau idi ereb sesen musei age difen. Anī nigin, Negur, taun anidi, yā nem daū feledin.

Solomon (Matyu 1:6-7, 6:29, 12:42; Luk 11:31, 12:27; Aposel 7:47)

Solomon ī Dawid ne naal. ī Israel tamо kayau neid king odug taka.

Sain taka bun, Negur imīya bun, Solomon bun isi fen, ere safina ege luwa anī ī ifenēf anī orof anī to fiyen. Solomon ī, in tamo kayau sā el fe ulum iroukenēdiyout nigin Negur kisi biya ī ifenēf nigin ī irokenen. Negur kisi biya odug Solomon ifenen, ī king ganan anidi bun kisi biya bagai anī wō yen. Negur Solomon safina odug musei bagaig anī ifenen, momoi, ī safina musei anī kisi feleya bagai.

Solomon im anī uyulil Negur nē Tempel inon. Tempel anim Negur nē salafat uruwa bun Juda idi Negur yana dalesedig anī nē modoū yalen. Tempel anī gai meli bagai.

Stoik Tamo Epikurian tamo bun ulouf

Sus (Aposel 14:12)

Sus are waitou odug Grik idi yana dalesedig anī nē yana. Sain tunī, tamo kayau ī anī Jupita dedig. In soosi tamo are Hermes dedig.

Tamo Naal

Kulu bagai, kel yaleya tamo anī Negurem yogen tamo kayau nedī mosor bun tamal kel gei fediyout nigin sur fouf yen anī, profet taka Daniel dedig anī kel yaleya tamo anī nē yana agef irōdig. Anī nē gariya are Kristus de tekelei (Kristus bun ulouf). Jesus yogo nigin yana eneī agef irōdig. Sain Jesus yogo nigin aya Tamo Naal yef, are ī anī tamo taka Negurem sur fiyen ado, ī anī Negur bun tamal megeir yalen anī yef. ī tamo bagai, are ī anī Negur.

Wau Faleiya

Wau faleiya nē gariya bagai are:

1. Tamo taka ī sane age fen anī ilouf;

Enei Bun Ifaredif Ně Fadedya Yis xxxix Enei Bun Ifaredif Ně Fadedya Yis

2. Í irok, í ereb sesen age fedig anĩ itor ken, ereb Negur orof anĩ age fouf;
3. Í ereb sesen í age fedig anĩ ně mosor nigin weder tu kalauf nigin Negur irokenek.

Yis (Matyu 13:33, 16:6, 12; 1 Korin 5:6-8; Galesia 5:9)

Yis are safina bret inoya nigin kabĩ difenẽdig. Safina anim, bret gẽ youf nigin age fedig. Yis naalem dogol bret odug biya musei inoya nigin kabĩ difenẽdig.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

xli

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea